

سبحان الله

ما قصدش اكون شاعر

شوقه عبد الوهاب

## خطين ميتقابلوش سوا..

انا لما اموت  
هفتح شبابيك البيوت  
زى العفار اللى  
اتركن من ع الازاز  
بيبوس خجل جلاليب البنات  
متأجلة طلعت عواطفك  
من تحت حضن كراسة الحساب  
الهوا بيلعب فوق فيونكات الضفاير  
سهانى وعبا حجر الشارع  
جريد النخل اللى خارج  
من رائتى بصوت موجوع  
لبلاب بطول شهور السنه  
يعلم الدنيا الدفا  
من لبس حريم المدينه  
وانا اللى لابس قميص الفراغ  
بحاول اخرج بس مش عارف  
لحظه دخول الليل ف شراينى  
يتشقق من خوفى طريق  
يرسم على هامش كتاب  
خطين ميتقابلوش سوا.

## حنوة تعجب

السكه لو تبتدى م  
ها تروح لفين  
مفتوحه قدامى الشوارع  
سكك كثيره للرحيل  
دوامه بتشد العيون  
تحذف سنابل عمرنا  
داخل نجوم الليل  
الدنيا دى حسان عفى  
تسهل سنابك حدوتى  
على طريق المستحيل  
ياشباكين..

حلمى الكبير ما تبكونيش  
اول ما هوصل للوميض  
هاحط رجلي ع الوداع  
ما انا الوحيد اللى ما لوش  
طول عمرى خايب ف الحساب  
ما عرفش غير اطرح ف ناس  
وجمع ف راسى كثير حلول  
واقسم مع ولادى الرغيف  
كما طير حمام  
وقلبى لسه ما فهش طير  
لابسين هدوم الميتين  
مرشوقه عنا ع الحروف  
شمس و قمر  
فكرت اكون اللى اختفى  
ف لحظه خوف  
ف اخر السكه الضيقه  
الارض وسقوف البيوت  
وناس علمنا الجديد  
بتعانى عدم الشوف  
فرشين حصير المصطبه

ركبين حصان الهبل ع الشايطنه  
وان يوم نداها الشوق  
لكلمه حق طازه  
يدخل حصانهم جوا حوش الشرنقه  
يغتال عزمتك كلها  
معرفش ليه  
مع اننا مع بعض  
معصورين بين الرحا  
وانا قلبي فاضى ما فهش  
غير حبت دموع  
راسم مكانك دايرتين  
والموت حكيم عصر الزمان  
والصدق بيت من غير اساس  
الموت ساعات بيكون خلاص  
مش يعنى ان الموت حبيب  
انا بقى بتمنى اعيش  
وبحب من قلبي الحياه  
صبحين وللليل  
واما يناديني الشوق هناك  
اركب حصان الهوا وبياه اعدى  
ع القوافى و ع البيوت  
شوق السما مفتوح  
على وسع العيون  
وبغنى للموج والهوا  
يا لليل ..اه  
يا لليل..اه

## بیر غویط

ولاہی سرحانہ ف  
کبشۃ لیل طویل بيمصنا  
ویرمینا علی طرف جناح الطیر  
جسمی الوسیع خبط  
علی قلب المسا  
وانا ہدمتی خمرانہ  
علی رکن الوقید  
طیر خفیف بیحط  
علی حتۃ سحاب  
وتخجلنی وانا الی معری الجراح  
غوایش علی عود القصب تخضر  
وانا ماسک ف دیل الیل وحید  
مسکون یا ضل الروح  
بتوہۃ الاسئلہ لما البنات  
تشبک فساتنہا ف اخر  
نظرہ حنان  
ولما یندلق السمار تحت العیون  
تکاعیب عنب البنات  
علی صدرہم تبرق  
علی طعم خضرۃ  
بتنتہی ع الشفایف  
وفضلت انا عایم جوہ الشقوق  
عرايس البحر شبکونی ونسیتہم  
سقط المر غسل الحیطان  
من سر بشایرہم  
طلع النهار یفرش عیالکم بالكلام  
لیہ کل ما افتح  
قلبی یحاصرنی الخریف  
وازاى بتعرف  
زرع المندیل شفایف

والشجر دفيان ف حزن الرصيف  
خايف عليكى من رنه القبايب  
تدخل ف عقلوتسبنى زى الضيف  
انزف ف جرحى  
الطازة ع الرمله  
والمحطات ورا ضهرى  
فاضيه من غير وليف  
وقلبى العربى غلبنى  
وشككنى ف عواطفى  
وطير كل الحواس  
الخمسه على حب الرغيف  
دلوقتى هاطلع نخله الدنيا  
الون جسمى علشان ارجع نضيف  
ولسه عود الصبر  
محاصر كل عروقى  
بينز منى الدم  
يسقى اطفال الوطن  
حكايات زمانى اللى ضاع  
على طرف الفتيل  
بينى و بين قلتهم  
بير غويط  
وهديل على الابراج  
مليان بريحه ميتين  
كلمنى عن وطن  
مات كل رجالته  
واتعروا فيه البنات  
حمرتهم تقطف ريحه البلح  
بغداد..  
بوابه مفتوحه ع الموت  
والضل عسكر تمشى ف زومة ريح  
والانبياء نايمين على جمر الدموع  
زرر عنيك على خوفك وعدى  
والرعه غيمه بين رجلى

وبين الكون  
الرعء صوت القلب  
بيعدى على صدرى  
وانا اللى متكفف  
من اللسان والعين  
وقالوا الى طول ما انت طيب  
تضحك عليك الصحاب..

## من غير سابق انذار

بنتى الامورة الحلوة  
سابت الماشاية وراحت  
تمشى تخطى العتبه  
من اول باب  
وصوت الجزمة اللى بتضرب  
صفارة بتقول للخلق  
اترصوا فى طابور الخطاب  
وبتجرى الايام وبتكبر  
وتخلص دراستها ست الاحباب  
من غير سابق انذار يطلع فارس احلامها  
بعد شعر العمر ما شاب  
تخيل لما تكبرها وتشورها  
وتوصلها لحد الباب  
ياه..  
ينقسم القلب نصين  
وتسمع دقاته  
مش زى حالاته  
وكأنه ساكن فيه الاله  
شوف لما هاتصحى الصبح  
تلاقى مكانها الفاضى  
وسريرها المترتب خالى  
ضاع منه صوت انفسها  
ومكان كراسها ع المكتب  
بينادى اى كتاب  
يسأل الالة الحاسبه  
صوابها معدتش عليكى  
ولا حسبت للفرقة حساب  
لسه ابتسامتها ع الحيطه  
وخناقها مع احمد والزيطه  
وكسوفها لما بأنيها  
على صحن خدودها



يحمر بلون القوطه  
والقوطه الزرقا اللى بتعجبها  
على رف دولابها  
كيمو لسها بتعشق اكل البوزو  
بكريت اول فرحه ف عمرى  
كبرت يا ولاد  
بنتى الامورة عروسه وحلوة  
مع جوزها و بدعيها  
تعيش ف تبات ونبات..

## زرع البنات

و ببص لك وانا  
اللى مالى بلامل عيني  
لحد ما بغنى  
وينقسم بالغنا عودى  
ياراميه البلاحات والنخل  
مال طبطب على خدودى  
زرع البنات ع الكف  
رشق ف جسمى الشوك  
دبلت غصون الحلم  
وتهت ف حدودى  
وشك حليب عدا خفيف  
وساب لى وشم الحقيقه  
هربد ملامحى والبصه  
سكنت تحت الرمش  
على طلعة التفاح  
فوق طرف جلاييتى  
الناس تهل من كل البلاد  
وانا المرار ساكن على ريقى  
شجن الحوارى يحرس  
جمالك وانتى بتعدى  
يدق القلب يسمع  
كحة الفجر الخارجه م التسابيح  
يمكن يتخلق للصمت  
لسان يحكى اللى متخبي  
ويترجم اللى ينز  
العرق داخل دهاليزى  
بارسم خجل لوعتى  
وبهز رعشة ايد  
تحضن ف برد  
الشتا الضحكة ووريدى  
تخطف شقاوتى صرخة

قمر ع التل  
وتعري جرحى للمسافر  
على شفتك يا بحر  
فراشات بتهرب فى  
دمى ع الرصيف  
بتحنى ايدك بعرق  
الشمس وبتنسى مواعيدى  
اضفرك يا جرح واغطس  
فى بير روى  
وانا ما امتلك  
غير بس دمعاتى  
والغربه بتردنى  
لبلاد ما نيش منها  
وقلبى انا هربان  
مع عصافير الوطن  
جوه السؤلات البليده  
عايش فى تنهيدى  
وكأنى طير السمندل  
محتاج لتجديدى...

## زهرة على حنة سحاب

على غفلة اسافر  
مع نفسى  
من غير احباب  
من غير ياسمين  
محروم م الكلمة  
الحلوة وم السفرجل  
محبوس ف الاوضه الفاضية  
ارتب خوفى وابوح بسرى  
واروح لبعيد لحد  
ما اوصل لئاي الحلم  
احاول استضيف نجمة وحيدة  
اغزل جلايبية من خيط الريح  
واكشف للفجر عن شكل التوت  
استر عياطى ورعشة سقوطى  
من باب الدنيا المفتوح  
وارمى حمولى على  
صفحات ايامى الورق  
الناس الخرس بتحبل بالخوف  
والضحكة مش طازه  
وحتى مش لون المطر  
فرشوا البنات فوق حلمى الرموش  
رشقه ف جسمى دبابيس الظنون  
وانا لسه بسكر م العرق باليل  
القلة فاضيه و انا  
الى ميت م العطش

نزلوا الملائكة يستحموا ف الجروح  
وانا لسه بعبي للعشاق  
كبايات من دم الليمون  
زى ماكون عايش ف بلاد الرعب  
اللى عايش فى قلبى  
بيحف كل ليالى الفرح ف ايامى  
وانا لسه ساكك  
الصدر على اخر البكا  
ولسه بزرع زهرة  
على حنة سحاب...

## مزنوق في حوارى الغربية

من زمان نفسى  
اتجنن ع الغربية  
ما انا سايب قلبى هناك  
بهواك..  
ياوطن وانت بعيد  
وبعيد جوايا سنين جواك  
خفقان القلب معاك  
يشبه رعدة ايد المحبوب  
لحظة ما يدوب على طرف الوردة  
لما يقدمها الحبيب للبنت بتاعته  
لو هى بتبعته نظرة بشوق  
ويدوق الصعقة الماشيه ف جسمه  
لما بتلمس طرف صواب ايده  
ساعاتتهز مشاعر قلبه  
تندله اللحظة تعالى  
اطلع من مر الغربية  
يشعر بحفيف الموت  
بيفوت على اضعف  
حته فى نفسه  
لحظة ما بياخد نفسه  
ويحوش الفين تنهيده  
ياه...  
لسه السكة بعيد  
البيت مركون على  
آخر طرف الكون  
وانا جسمى العريان مجنون  
مش قادر يوصل  
زى الطير المكسور  
وحشاني امى هناك  
وبرغم ان انا بهواك ياوطن  
وبرغم ان انت بعيد  
انا لسه بعيد سنين جواك....

## لحن ارض من كل المعاني

مهداه الى كبش الفدا صدام حسين

يا ساقيه خضرا

بتدور ف الاصيل

أه..

يا بلد العياط والنخيل

والكوبيس اللي ف لوح العجين

هم عايش ف عيون الطفولة

من غسيل الصبح لنهر الفرات

تشتهى طعم دمي الهربان

ترفع وتبنى اوهام الظنون

اكوام من الورق القديم

وبحور من ملح البرارى

جسم شاحب يقب

على جسر العدم

يونييه يا شمس الحصيد

ومواعيد النار والنور

جوه عدسات العيون البلور

بلاد بتطرد من جلدها

عفن التاريخ وبقايا

من لعنة الايام

والبعد والغيب الحزين

تنفض عنها امبارح

واخبار الجرانين

القمر والاطفال والعنب

والخوف والهموم

والشواطى الفاضيه من كل النوارس

لسه بدور ف خريطة العالم

عن بيت ومدينه مسحوره

وسلام مش مقطوع الديل

و عيون بتضحك من جوه القلب  
مش خايفه عساكر ولا جلاذ  
مستنى سفينة نوح  
باتمنى المس آخر الاشياء  
ياسيدتى..  
يا عاصمة الشعر والشعراء  
ازاى دبخوا الفرخ  
النايم جوه العيون  
ودموعك بتبل ديل التوب  
وقميصك بيحزف جسمك  
والدنيا الميتم باب مفتوح  
الدمع انحاش ممنوع م البكا  
والدنيا تهسهس حواليكى  
ماشيه على كسر ازاز بالليل  
لصدى الصبح الباصص  
من بين الناي والريح  
وانتى البدوية السمره  
عايشه تشتهى لحن الفرخ  
وطفل طرى جاى  
من كوابيس المحن  
بيدور عن شمس  
بتدارى داخل اروحنا  
بكل ما فيكى من صدق وبرائة  
جنه على حدود المستحيل  
كلمات بتقلب جوه توريك  
يا اجمل حبيبى بتبنى  
قصر م الاوهام  
وتكتب مذكراتها فوق الميه  
وعلى ارفعة الشوارع  
ولما ماتت جابوالها الكفن صدقه  
وغنوكى لحن ارحص من كل المعانى...



## ببساطه

خايف قبرك ما يكونش مريح  
ببساطه اول ما ها ترخى  
ستاير شباكك  
راح يبهت لونك على طول  
وهايتحدد ببساطه مصيرك  
زى بساطة دود الارض  
خايف من ايه  
من شدة عطفك ع المجاريح  
ولا انت مش طايق صمت الريح  
ولا نوم الخلق الزهقانه  
على كل رصيف  
الايوضه العاتمه اللى انت ساكنها  
والزمن الهايف والامل المكسور  
لسه بيصرخ جواك  
خايف م الكذب المالح  
او ابتسام بيوت مقفولة الابواب  
وانت اللى لسه ف انصاص الليالى  
بتحايل الكلمة تسكن  
جوه بيوت الاشعار  
بحلق ف عيون الشمس  
واقطف خدود العنب  
انفض هموم الغلابه  
جوه وطن مش وطنك  
ووقت مش وقتك  
واهرب ف الماضى القديم  
واوعى تلمس بداية صبح  
جاي من عيون الليل  
طارح طريق للشوك  
او ضحكه صفرا بلون مخدوع  
تبان تلمع تنور لك

طريق ممنوع  
يا هل ترى..  
فيه ناس بتهرب  
فى كل الظروف  
وناس بترضى بعدم الشوف  
روح قول لهم  
شعر ينعش الاحساس  
روح ولمهم عن  
بخل الارض ونزول المطر  
مقبوله منك لو تبعينى للضله  
على فروع الشجر  
لكنى دايما وابدأ  
تلاقينى جنبك فى  
اول ساعات الخطر...

## خطوتى الناقصة

الغربة وخدانى  
ارسم للناس صور  
والناس قبالى ميتين  
وانا لسه بشتاق للوطن  
ونزفت دمي بهلوان  
وغزلت طيفك امل  
وفرشت ضلعي كان غطا  
بينى وبينك ف العتاب  
كلام كثير  
يا سيبه نفسك للى له  
واللى ما لهوش  
يلعب معاكى بالغرام  
يا مدلدله قلبى الجريح  
شباك ومليان بالقسا  
بيسرق منى دفى الشمس  
اسمع كلامك ف الغنا  
عرايس بحر  
قابلىنى اخر مره ع الكورنيش  
نهتف قدام عرش الاله  
لما ارتعش لحظة غيابك  
يا عزيزة..  
يا ام الشعر السايح جدا  
زى لون الليل  
امسكى ف ايديه جامد  
شبكى صوابع ايديكى  
دا الهوى ف القلب صامد  
والحزن مش لايق عليكى  
طول ما احنا قادرين نعدى  
م المدينه لزحمة الشارع  
ها نفرد ع السكك اشعار  
ونصحى الناس وكلام الحب

يا عيون سراقها الحزن م المانجه  
هذا السمار علمنى احب الشجر  
واعشق لغات الفراولة  
القمره عامله نفسها ناسيه  
وانا نفسى اكمل خطوتى الناقصه  
ماسك فى ايديك وبكمل المشوار...

## الشاطر حسن

يطلع على الصبح  
وانا الشاطر حسن  
راكب حصاني الورق  
وسارح في الخيال  
تشهق عواطفى تناديكى  
على البعد غنوايه  
حين ينطفئ نور الامل  
على جميع السكك  
لحظة خسوفك بالنهار  
يداهمنى فيكى المسا  
ما بين وضوح التلاقى  
وبين متاهات الكلام  
تبيعيلى وهم النهارده  
جوه سوق بكره  
واعشق طيور النوارس  
على وش الكنال  
من نظرة الخوف م الفشل  
تزهد على نفسى  
واهرب فى خيال الناس  
اسبح ويا الملايكه  
حاضن ضلوع الفجر  
تسكرنى نقطة ندى  
كيف يستريح قلبى الشقى  
فى سكه تعبانه  
لحظة ما تميل ليالى  
القهر با الفسحة  
القانى بغرق معاكى  
واسأل عن الشاطر حسن  
مقتول على الاحساس  
فى العند بيخاطر  
يهرب من الحراس

مع كل نقلة قدم  
شاييل هموم الناس  
ما خجلش يوم شافك  
تحت الشقا عريانة  
اه..

من عنيكى والبعد فى المسافات  
اه..

من ايديكى ورعشة الالهات  
بنا الكرابيج وكتايب العسكر  
وانتى اللى لحظة  
ما اعوزك بتهربى منى  
اكنى عاشق وشاعر  
وبحب فرحى يوصل لحد البكا  
واعشق كلام الغنا والدندونات  
اه..

يا قسوة الحكايات  
والغربه فى عيون الوطن  
لحظة ما اكون خايف  
يرعبنى لون الخيانه  
م الخل والصاحب  
وانا اللى قاطع رمل الجبال فيكى  
وبحب لونك و طعمك  
وبا مصعب المشوار...

## عصفور يزقزق

طلقت قلبي ع الوطن  
عصفور يزقزق بالحنين  
وفتحت باب القفص بدرى  
وانا جوه صدرى  
بيوتك القش بهتانه  
يام المواعيد الحزينه  
كيف يستريح قلبي الشقى  
فى حضن قلقانه  
ببشدنى وهمى الخفى  
لصدرك الفاضى الوسىع  
يصعب عليه الحلم  
تهزمنى فيه الاسامى  
واخاف م الصبح العفى  
يخطف منى السنين  
ويجز العمر جوايا  
بمنى نفسى برحلة  
فى بحر نسيانك  
اسكر بالمطر والضل  
واشم ريحة القلق  
واحب شجر الكافور  
والمسك والعنبر  
اغرق واتوه ف رمل صمتك  
واعشق سكوتك  
الم من عيون الخلق  
فرحك وضحكائك  
ما بين متاهات الكلام والقهر  
وانا اللى فوق قلبي  
شايل هموم الناس  
يطلع عليه الصبح  
اتغرب على جميع المفارق  
بقصد نتلاقى

لاكنى اسقط ف لحظه  
فى ركن ليل الشتا  
تحت المطر والموت  
جوه الرصاص ننسجن  
وعنينا خلف البنادق  
والغنة تبقى انتى  
عدينا فى ايدينا الرايات  
دراعتنا قد الموج  
ولا انتى دريانه  
ممدود على حدود البصر  
شعرك الناعم  
يشبه ضفتين الكنال  
ان الاوان نرتاح  
يسهر فى ليلنا القمر  
ونرجع ع الصدق يوم قادرين  
نصاحب الشمس من تانى  
ونرحل فى بحور الخلق  
وندوب على وشك زى الملامح  
ويبهت لونا على لونك  
ونقول كان ياما كان  
واد اسمر جميل  
عبر فى يوم ع المستحيل  
وداس على خوفه  
وقف معاه الزمن  
يسمع له ويشوفه  
فى الصبر كان ايوب  
فى الشده كان عنتر  
فى الحكمه كان الفاروق  
فى الماشيه يتغندر  
معجون بلون الرغيف  
والقلب دا عاشق  
والحب كان ناعسه  
والبخت كان لايق



فرحان بريحة الحياة  
وانتى فى وجدانه  
مطرح ما تلقى اتر  
منك ها يلقانى  
ما هو انتى طلق الميلاد  
ترعشنى احزانك  
يا ضعيفه ضعف الخير  
وبسيطه زى الفقارة  
اهرب لحضن الكون  
فى حوش بيوت الرفاقه  
على قد شوق الحلم  
بكره هدؤ الاستكانه  
وفى عينى نبل الامانه  
اجمع كيانى المبعتر  
يفك عقدة لسانى  
واصرخ فوق الميادين  
فى وش اى دخيل  
واطلق خيال شعرى  
يرمح فى عقل الناس  
العثرة والبهلول  
واغنى حبى واقول  
يا ناعسه يا صابرة  
احنا فى ليالى العيد  
راجعين وشوقنا يزيد  
وتهلل الفرحة  
تدخل تفانين الشعرا  
رعشة فى عيون الاطفال  
و ف حق الناس الشغيله  
فين راحت لمت الاخوات  
ورجع لزمنا الترحيله  
نفسى القتل حكايات الزيف  
واقتل اغوات السلاطين

راح اجيب اللقمة من بق العفريت  
واجرى على القمر الاخضر  
مش عايز حلمى فى يوم يصغر  
واشوف الفرحة اوسع م البحر  
ما انا لسه مزروع و ف طينك  
با سمع غنا ناعسة  
يجى الحنين يسعى  
وانسى العذاب والخوف  
وانام على صدرك  
مستنى لحظة رجوع..

## يا ارتعاشة عمر فناء

اتقبلنا على اول  
طريق متسفلت بالشعر  
كانت عنيكى الدنيا  
وقلبى مركب ورق  
غرقان فى حلم كبير  
كان الامل اساطير  
ابيض بلون الرغيف  
والخوف مالى القلوب  
الكون جنون عشقى  
مفروود بطول الشعور  
واصل للعب الكبار  
رهان جوه انتحار  
والوهم كان انتى  
والبيت ما عدش الوطن  
السجن عاش فى الروح  
الفارس الملهم ما هوش بطل  
والايدين ابعده من شطوط الكون  
والقلب عصفور النهار  
والليل شعور بالقسا  
اه..

من عنيكى والخوف من الايام  
ما تفكى اسرك لقلبى  
ولمى حروف الصدق  
من فوق الضلوع  
يا صاحبتى..

تعالى نعمل قوس قزح  
ونعمل هيسه وفرح  
ونبنى عالم م الصلصال  
وننسى العيون السود  
ونقفل باب على امبارح  
ولحظة لوم وكان جارح

وردي لهفتى لصوتى  
عيونك مية المحياه  
بتوهبنى الجمال والحب  
واجمل حكايات الشتا  
واحلى غناوى الصيف  
اه..  
يا ارتعاشة عمر فات  
حس الزمان والذكريات  
عطشان ونبع اشتياقى  
اتهجى الحلم ف حروفك  
وتخذنى لمسة ايديكى  
حد الجراح والياس  
تلقفنى زحمة مواجعى  
لكل كذب المدن  
والعن عيون الخداع  
والضعف لوف الخير  
وسط الزحام وحدنا  
والضحكة قطر الندى  
اوسع من الدنيا  
والدنيا انتى وانا  
يا زهرة السوسنا السكه متلخبطه  
بنمشى فيها بجنب...

الشاعر

**شوقي محمد الوهاب**  
عضو اتحاد كتاب مصر

## فهرست المحتويات

- ٢ - ..... خطين ميتقابلوش سوا
- ٣ - ..... غنوة تعب
- ٥ - ..... بير غويط
- ٨ - ..... من غير سابق انذار
- ١٠ - ..... زرع البنات
- ١٢ - ..... زهرة على حنة سحاب
- ١٤ - ..... مزنوق ف حوارى الغربية
- ١٥ - ..... لحن ارخص من كل المعانى
- ١٧ - ..... ببساطه
- ١٩ - ..... خطوتى الناقصة
- ٢١ - ..... الشاطر حسن
- ٢٣ - ..... عصفور يزقزق
- ٢٧ - ..... يا ارتعاشة عمر فات
- ٢٩ - ..... فهرست المحتويات

خايف من ايه

من شدة عطفك ع المجاريح

ولا انت مش طايق صمت الريح

ولا نوم الخلق الزهقانة

على كل رصيف

الارضه العتمة الى انت ساكنها

والزمن الهايف والامل المكسور

لسه بيصرخ جوايا

خايف م الكذب المالح

ولا ابتسام بيوت مقفولة الابواب

وانت اللي في نصاص الليالي

بتحايل الكلمة تسكن جوه بيوت الاشعار

شوقى عبد الوهاب